

Kalaam Kī Taaqat

Taurait : Yashaayaah 55:1-3, 6-13

Āo, tum me se jo bhī pyaasā hai,
paanī ke paas āo;
aur jiske paas paise naheen haiñ,
wo log āo aur k̄hareed kar khaao!
Āo, aur ā kar aṅgur aur dudh k̄hareedo.
Binā paisā k̄harch kiye hue.⁽¹⁾
Us par paisā kyuñ k̄harch karte ho jo tumhaarā khaanā naheen hai,
aur wo mehanat kyuñ karte ho ki jis se tumheñ sukun naheen miltā?
Suno, merī baat dhyaan se suno, aur wo khaao jo acchā hai,
aur tumheñ lazzatdaar khaane kā mazā āegā.⁽²⁾
Merī baatoñ ko bahut dhyaan se suno;
agar sunoge, to ho saktā hai ziñdagī ko haasil kar lo.⁽³⁾

6-13

Allaah rabbul azeem ko talaash karo;
usī ko pukaaro, abhī wo tumhaare bahut qareeb hai.⁽⁶⁾
E gunaahgaar logoñ buraaī ke raaste se haṭ jaao,
aur apnī burī soch ko badlo.
Agar wo Allaah taa'alā kī taraf lauṭ gae, to wo un par raham karegā
aur unheñ khule dil se maaf kar degā.⁽⁷⁾

Hamaarā rab farmaatā hai ki uskī soch hamaarī soch se behatar hai
aur uskā tareeqā hamaare tareeqe se acchā hai.⁽⁸⁾
"Jis tarah ye āsmaan zameen se bulañd hai,
usī tarah se merā tareeqā bhī tumhaare tareeqe se bulañd hai
aur merī soch tumhaarī soch se."⁽⁹⁾

"Jis tarah se baarish aur barf āsmaan se neeche ātī hai,
aur zameen ko binā bhigoe waapas naheen jaatī.
Taaki usse zameen par kaliyaan phuṭeñ aur phaleñ-phuleñ,
aur beej nikle, aur khaane ke liye anaaj paidā ho."⁽¹⁰⁾
Isī tarah se merā kalaam,
mere paas kabhī k̄haalī waapas naheen ātā.
Balki wo hotā hai jo mainī chaahtā huñ,
aur wo us kaam ko purā kartā hai jiske liye maine use bhejā thā.⁽¹¹⁾

"Tum k̄hushī se nikloge,
aur tum salaamtī se āge baḍhoge.
Ye pahaaḍ aur pahaaḍiyaan tumhaare saamne naḡmeñ gaaeñge,
aur maidaanoñ me lage sab peḍ taaliyaan bajaeeñge."⁽¹²⁾
Kaṭeelī jhaaḍiyaan naheen, balki baḍe peḍ ugeñge,
aur kaañṭeñ naheen phul waale peḍ nikaleñge."
Ye sab Allaah rabbul azeem kī shaan ke liye hogā,
aur kabhī n k̄hatm hone waalī nishaanī ke liye,
jo hameshā baaqī rahegī.⁽¹³⁾